



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM
ADMINISTRATIVNA KOMISIJA
Broj: 01/7-011-327/03
Sarajevo, 10.03.2003. godine

ZAPISNIK

Pete sjednice Administrativne komisije Predstavničkog doma Parlamentarne skupštine BiH, koja je održana 10.03.2003.godine, u trajanju od 12,00 do 13,30 sati, u zgradi institucija BiH. Sjednici su prisustvovali članovi Komisije: Šefik Džaferović, Mirko Blagojević, Hazim Felić, Momčilo Novaković, Jozo Križanović, Munib Jusufović, Ivo-Miro Jović, Nikola Kragulj i Vinko Zorić.

Sjednici su prisustvovali Vedran Hadžović, sekretar Zajedničke službe, Branka Todorović, sekretar Predstavničkog doma, Mirjana Crnjak, šef Opće službe, Jadranka Korać, šef Službe računovodstva, i Dragica Hinić, stručni saradnik u radnim komisijama Parlamentarne skupštine BiH.

Predsjedavanje sjednicom započeo je Vinko Zorić, prvi zamjenik predsjedavajućeg Komisije. Za sjednicu je predložen slijedeći

DNEVNI RED:

1. Usvajanje Zapisnika 4. sjednice Administrativne komisije;
2. Razmatranje preostalih žalbi u kontekstu provođenja Odluke o pravima poslanika i delegata na stalnom radu u Parlamentarnoj skupštini BiH nakon 05.10.2002. godine;
3. Tekuća pitanja.

Dnevni red usvojen je jednoglasno.

Prije razmatranja tačaka usvojenog dnevnog reda, članovi Komisije jednoglasno su izbarali Muniba Jusufovića za predsjedavajućeg Komisije, umjesto Izeta Žigića koji je otišao na drugu funkciju. Munib Jusufović je potom nastavio predsjedavati sjednicom.

Ad.1.

Zapisnik 4.sjednice Administrativne komisije usvojen je jednoglasno.

Ad.2.

U okviru ove tačke ponovo je vođena rasprava o prigovorima tri poslanika za ostvarivanje prava na plaće nakon 05.10.2002. godine i to: prigovor Bahrije Osmanović, koja je imala status penzionera prije profesionaliziranja svog radno-pravnog odnosa u Parlamentarnoj skupštini BiH, te prigovori poslanika Mirka Banjca i Branislava Lolića, koji su rješenjem umirovili svoj radno pravni status.

U raspravi su učestvovali Momčilo Novaković, Vinko Zorić, Jozo Križanović, Šefik Džaferović, Nikola Kragulj i Munib Jusufović.

Jedinstven stav prisutnih je da se u pogledu tumačenja sva tri zahtjeva prelazi sfera prava i ulazi u sferu arbitriranja.

Raspravljajući o pojedinačnim slučajevima, većina prisutnih mišljenja je da je nejasan trenutni status Bahrije Osmanović, o kome se nije želio izjasniti i dati tumačenje ni PIO/MIO FBiH. Također, većina prisutnih su mišljenja da bi se najbolje rješenje našlo u izmjeni

postojeće odluke, kojom bi se rok za isplatu plaća skratio na šest mjeseci, i time omogućilo svima koji žele da ostvare to pravo. Uslov za navedeno je da i Komisija za finansijsko-administrativne poslove Doma naroda izglasa ovu promjenu.

Šefik Džaferović smatra da se predmetna tri zahtjeva mogu riješiti na dva načina. Prvi način bi bio da se primjeni postojeća odluka. Pri tome se osvrnuo na pojedinačne zahtjeve. Za zahtjev Bahrije Osmanović nije siguran da se može formalno-pravno odbiti, te stoga treba ponovo tražiti tumačenje PIO-a o njenom statusu, zahtjev Mirka Banjca po njemu bi trebalo odbiti jer se on može vratiti na radno mjesto koje odgovara stručnoj spremi koju je imao u trenutku umirovljenja svog statusa, dok bi u slučaju Branislava Lolića trebalo decidno zahtijevati izjašnjenje od KBC-a Banja Luka, da li se on može vratiti na radno mjesto u skladu sa svojom stručnom spremom.

Drugi način rješavanja išao bi u pravcu izmijene postojeće odluke skraćanjem roka na šest mjeseci svima i omogućenje tog prava svim poslanicima koji su podnijeli zahtjev.

Munib Jusufović i Nikola Kragulj mišljenja su da ovo pitanje prelazi u fazu arbitriranja i predložili su da se o istom odluči na zajedničkoj sjednici koja slijedi u nastavku dana. Ukoliko se na zajedničkoj sjednici ne promijeni odluka, onda će se morati raditi po važećoj odluci.

Nakon rasprave većina članova Komisije zauzela je stav da će na zajedničkoj sjednici predložiti izjednačavanje prava svih poslanika i delegata, s tim da se ide na smanjenje obima prava i skraćanje roka na šest mjeseci. Ukoliko na zajedničkoj sjednici ne dođe do promijene odluke, onda je neophodno raditi po važećoj odluci.

Ad.3.

U okviru tekućih pitanja razmatrana su:

a) Dva zahtjeva poslanika za profesionaliziranje radno-pravnog statusa i to:

- Petra Kunića, počev od 01.04.2003. godine i
- Ruže Sopte, počev od 01.03.2003. godine.

Članovi Komisije oba zahtjeva su jednoglasno prihvatili.

b) Zahtjev Muniba Jusufovića za ostvarivanje naknada iz prava na odvojeni život od porodice, prava na zakup stana, naknada za četiri posjete porodici, počev od 01.01.2003. godine (u kontinuitetu).

Članovi Komisije su zahtjev jednoglasno prihvatili.

c) Zahtjev Seade Palavrić za isplatu novčane pomoći zbog teške bolesti člana uže porodice-majke.

Članovi Komisije su zahtjev jednoglasno prihvatili, saglasno postojećoj Odluci o načinu obračuna plaća i ostalih materijalnih prava poslanika i delegata.

d) Munib Jusufović je u kontekstu predstojeće obaveze izrade rebalansa Budžeta, inicirao pitanje izjednačavanja koeficijenata svim predsjedavajućim klubova i komisija oba doma, o čemu su svi prisutni zauzeli jedinstven stav sa kojim će ići na zajedničku sjednicu.

Također je istaknuo potrebu povećanja osnovice za isplatu plaća koja se nije već duže vrijeme mijenjala. Dalje je naglasio potrebu rada na izradi budućeg zakona koji će regulirati sva ova pitanja. Po njemu bi stručna služba pripremila ovaj materijal koji bi dalje razmatrala oba kolegija, onda radna grupa od po tri člana iz obje administrativne komisije, a potom bi isti bio razmatran na zajedničkoj sjednici ovih komisija.

Zapisnik sačinila
Dragica Hinić

Predsjedavajući komisije
Munib Jusufović